

Nunamut tamarmut akileraarutitut procenti 9 procentimut aalajangersarlugu Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisissaattut siunnersuummik saqqummiussaqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaqa Jens-Frederik Nielsen, Demokraatit)

Akissuteqaat

(Aningaasaqarnermut Akileraartarnermullu Naalakkersuisoq)

Siullermeenera

Aalajangiiffigisassatut siunnersuut saqqummiunneqartoq pillugu Naalakkersuisut sinnerlugit qujavunga.

Siunnersuuteqartup nuna tamakkerlugu akileraarutit procentia maannakkut 10 procentiusoq 9 procentimut appartinneqarnissaa aalajangiiffigisassatut siunnersuutikkut kissaatigaa. Ilimagineqarpoq nunap karsiata angusai 2024-mi kisitsisit atorlugit 124,6 mio. kr.-t missaannik ajorteriarnanik kinguneqassasoq, ilimagineqarporlu ajorteriaat 2027-mi 132 mio. kr.-nut qaffassasoq

Aalajangiiffigisassatut siunnersuuteqartup aningaasalersuutitut tikkuarpaa, suliniut Nunatta Karsiani aningaasatigut atorneqarsinnaasunit aningaasalersorneqassasoq.

Akileraartarnermik aaqqissuusseqqinneq pillugu siamasissumik isumaqatigiittoqarnissaannik kissaateqarneq Naalakkersuisunit aallaqqaasiullugu oqaatigissavarput. Naalakkersuisut, Inuit Ataqtigii Siumullu, akileraartarnermik aaqqissuusseqqinneq ” Nunarput najoruminarnerulersitsigu” pillugu isumaqatigiinniarnit 2023-mi naammassivaat. Ajoraluartumik partiit tamarmik peqataaffigisinnaasaannik isumaqatigiissusiortoqarsinnaasimangilaq. Tamanna aamma ajorisassaangilaq. Akileraartarneq pillugu siunissami aaqqissuusseqqinnerit sammiviisa piviusunngortinnissaannut tunngatillugu matu partiinut tamanut ammavoq.

Akileraartarnermik aaqqissuusseqqinnerit sammiviisa aappaat inuttut atukkanik aningaasaqarnermillu oqimaaqatigiissaarilluni inatsisissatut siunnersuutikkut ataatsimiinnermi uani imm. 13-itut suliarineqartussaasumi piviusunngortinneqarpoq. Aaqqissuusseqqinneq inummut ilanngaammik qaffasinnerusumik aamma isertitakinnernut akunnattumillu isertitaqartunut sulisunut suliffeqarnermut ilanngaammik qaffasinnerujussuarnik imaqarpoq. Akileraartartut affaat sinnerlugit ukiumut 250.000 kr.-t ataallugit inuussutissaqarput. Pingaartumik inuit taakku akileraartarnermik aaqqissuusseqqinneq iluaqutigissavaat. Akileraartartut tamarmik 82 procentit missaaniittut akileraartarnermik aaqqissuusseqqinnissatut siunnersuut iluaqutigissavaat, tamassumanilu akileraarutit katillugit 366 mio.kr.-t missaannik appartinneqassapput.

Naalakkersuisut inatsisissatut siunnersuutaat akisussaassuseqartumik oqimaaqatigiissaartumillu aningaasalersorneqarpoq, ilaatigut aningaasanut inatsimmi atorneqarsinnaasut apparnerisigut tamassumalu saniatigut sulisoqarnermut akitsuutip aningaasanullu inatsimmi isertitat allat annikitsumik qaffannerisigut.

Naalakkersuisut siunnersuutaat akuerineqarpat, aningaasaqarnermik akisussaassuseqartumik politikkeqassagutta aalajangiiffigisassatut siunnersuutip massuma aamma aningaasalersornissaanut akissaqanngilagut. 2025-mut aningaasanut inatsimmi sinneqartoorutissatut ilimagineqartut Naalakkersuisut isumaat malillugu aningaasaqarneq tassanngaannaq allanngussappat Nunap Karsiata kinguariaataasinnaasunut pakkersimasarininnissaannut atorineqartussaapput.

Aalajangiiffigisassatut siunnersuut Naalakkersuisut akileraartarnermik aqqissuusseqqinnerannut taarsiutaassasoq siunertaappat oqaatigineqassaaq, aalajangiiffigisassatut siunnersuut inuppassuit akileraartarnermik aqqissuusseqqinnermiit iluaqutiginninnerussavaat.

Assersuutigalugu inuit ilaqtariit marluk suliffeqartut tamarmik immikkut ukiumut 250.000 kr.-nik isertitaqartartut pissutsit taamaaginnartillugit nuna tamakkerlugu akileraarutit appartinneratigut isertitaminnit 3.840 kr.-nik atugassaqarnerussapput. Akerlianik akileraarutit aqqissuusseqqinnikkut isertitaminnit 32.511 kr.-t missaannik atugassaqarnerussapput. Taamaalilluni siunnersuutit taakku marluk assigiinngitsorujussuupput. Akerlianik nuna tamakkerlugu akileraarut appartinneqarpat isertitaqarnerusunut iluaqutaassaaq, naligiinnginnerlu annertunerulissalluni.

Taamaammat Naalakkersuisut isumaqarput, Naalakkersuisut akileraartarnermut aqqissuusseqqinnissamik inatsisissatut siunnersuut saqqummiussaata, manna aalajangiiffigisassatut siunnersuummut sanilliullugu, isertitakinnerit akunnattumillu isertitallit atugaannik pitsannguissamik politikikut anguniakkamut naapertuunnerusoq.

Taamatut oqaaseqarlunga aalajangiiffigisassatut siunnersuutip itigartinneqarnissaa inassutigissavara.